

2-4lobulata vel dentata; lobî dentesque foliorum omnes apiculati. Caules numerosi, è basi prostrato ascendentes, flexuosi, ramosi, ramis patentibus. Radix digiti crassitiem æquans, fusca, brevis et ramosa, biennis vel perennis. — Patria ignota.

BARKHAUSIA AMPLEXIFOLIA *Nob.* — Calathidia pedunculata, in racemo laxo subcorymboso disposita, ramis axim primarium supereminentibus, pedunculis plus minus longis patulis pubescenti-glandulosis. Involucrum cinereo-pulverulentum, squamis linearibus acutis, nervo dorsali crasso percursis, glandulosis; calyculus squamis duplò brevioribus laxiusculisque constans. Corollæ flavæ; exteriores extûs purpurascens. Stigmata flava. Akenia fusiformia, tenuiter striata, aspera; marginalia apice attenuata; centralia in rostrum fructûs longitudinem æquans. Receptaculum glabrum, alveolatum. Folia glabra vel ciliata, integra vel sinuato-dentata; radicalia in petiolum attenuata; caulina ovato-lanceolata, basi cordato-auriculata et caulem amplectentia. Caules ascendentes vel diffusi, flexuosi, pubescentes, ramosi. Radix gracilis, annua. — Patria ignota.

BARKHAUSIA JUVENALIS *Delile, Ind. hort. Monsp. 1836, p. 23.* — Calathidia solitaria, pedunculata; pedunculi elongati, antè anthesim jam erecti, sub apice demùm incrassati et fistulosi, apice verò ipso contracti, araneoso-pubescentes, bracteolâ unicâ sæpiùs suffulti. Involucrum primùm albo-tomentosum, glandulis destitutum, squamis linearibus acutis et lineâ pilorum rigidorum et ascendentium dorso hispidis; calyculus squamis inæqualibus, duplò brevioribus, subpatulis constans. Corollæ saturatè luteæ, concolores. Stigmata lutea. Akenia fusca, fusiformia; marginalia pubescentia, erostria, striata, haud aspera; centralia longiora, glabra, striata, aspera, rostrata, rostro akeniis breviora. Receptaculum villosum. Folia glabriuscula; radicalia petiolata, erecto-patula, oblongo-lanceolata, sinuato-dentata vel sinuato-pinnatifida; caulina pauca, amplexicaulia, ad basim dentata vel incisa. Caules patuli, simplices vel ramosi, ramis erectis, axim primarium supereminentibus. Radix annua, gracilis, ramosa. — Patria ignota.